

# Balua na bini gba Djaa Eli na kalanu

Ngbengbe ongu inde li Djaa aye e bhú balua inde-e bhisi: Engú na bini ani aye e, a pindji nato masi bhú okpála inde ngatanga balua gba ani, ngubula me u du bhú makpɔtse na kukulu bhú dabili bini ne Ebhe, di ne Ndili gba ani Yesu Kilisito , la di ne napa me u lila lio ka nasuno nasisiti inde i ti da nabhele makpɔtse ango-o. Nasuno ango-o, ala pí engú inde u ngapa lie me, i du me kpála nde abu 'kpa e li ndu 'ngú hana inde atsia kute kpála-a, ani kólo sisiti. Kaka-a, a ayo nani de me Yesu Ndili gba Ebhe kolo kpála-kuti-e de. Omusuno bhomu adu apa me, a ayo me kpála koto bhú ndu 'ngú hana inde atsia kute-e makoto. U atsia asuno di me, mukobho na duduma tsia engú napa de me kpála du amene badha 'ngú, ne me ani du ne mukunda pi okpála koko de.

La-a, ngubula napa me engú li okpála bhomu apa e a ko eu-o, Djaa atsia apa mbámá me, Yesu Kilisito nani ne kpála-kuti. Ani atsia apa di me, ndu okpála hana inde abhuka Yesu-o, inde la di ne mukunda pi Ebhe-e, a ayo me u du ne mukunda sunda o.

**Ongbengbe ongu inde bhú bhuku inde-e ngae inde:**

Eli na kalanu 1:1-4

Zi 'kpí, a la di-e biti 1:5 – 2:29

Ongisi gba Ebhe, a la di-e ongisi gba Djabulu  
3:1-24

Ngbili 'ngú, ne pulu 'ngú 4:1-6

Ongú inde a ayo me u ue bhú mukunda 4:7-21

Nabhuka na kpekpeke 5:1-21

*Eli inde ayie agba Ebhe-e, a ko Eli na mukobho*

<sup>1</sup> Ya ngaye balua inde-e pi yi pindji Eli na mukobho. Eli ango-o adu nani kala ndu 'ngú hana nayie li lilita. Ya adje Eli ango-o. Ya au Eli ango-o ne djila ya makpe. Ya atsia ne kpéke djila, ya atsia abu di 'kpa ya tété. <sup>2</sup> Li mukobho ango-o apana lie lie, ya au ne djila ya. Kaka-a, ya ngakpokpo 'ngú pi yi tété. Ya la di ngasuno pi yi mukobho na dudama ango-o, inde adu nani agba 'Dyi ní, inde apana la di lie pi ya ko. <sup>3</sup> Ya au engú inde-e ne djila ya, ya atsia adje di ne 'dje ya. Ya ngasusuno pi yi, amba ngayi di-e, yi kpetsø liyi ne ya bhú dabili bini, bhú makpetsø inde ya nde bhú e ne 'Dyi ní, la di ne Ndili gba e, Yesu Kilisito ko. <sup>4</sup> Ya ngaye la di engú ango-o pi yi, ngabula me ní\* bedhe ne djali.

*Ebhe ne zi 'kpí*

<sup>5</sup> Ngali inde ya adje e ka Yesu Kilisito-o, inde ya asuno la di e pi yi-e ngae inde: Ebhe ne zi 'kpí, biti la di bhú ani belegu ade bini. <sup>6</sup> I du me ní nde apa me: «Ya akpetsø liya ne ani bhú dabili bini» me ní nde ngadholo bhú biti-e, amba ní ngapa eu, ní mene la di engú na kukulu de. <sup>7</sup> Engú bini, i

\* **1:4** 1:4 Ní: Bhú obhuku koko-o, u a aye me: «Djali gba yi.»

du la me ní nde ngadhólo lí zì 'kpí maka ngaani Ebhe makpe nde líe lí zì 'kpí-e, amba ní akpètse líní bhú dabilí bini ne ondaise ní akpètse. La di-e, ngute gba Yesu, Ndíli gba aní-e, ngavulu ní ne ndu siti 'ngú hana.

<sup>8</sup> I du me ní nde apa me ní mene siti 'ngú de-e, amba ní ngapite líní nganí makpe, káku lu 'ngú la di bhú ní ade. <sup>9</sup> Engú bini, i du me ní nde apandja osisiti 'ngú gba ní-e kala Ebhe-e, ka aní nde líe ne kpála na ngbingbili-e, inde amemene di engú aní apa e-e, aní 'é osisiti 'ngú ango-o, aní tsia vulu ní bhú ndu 'ngú hana inde ngbingbili bhú djila aní ade-o. <sup>10</sup> I du me ní nde apa me ní mene siti 'ngú de-e, amba ní nga'o Ebhe kpála na eu, eli gba aní-e la di bhú ní ade.

## 2

<sup>1</sup> Odi ma, ma ngaye engú inde-e pí yi, amba yi améne siti 'ngú de. Engú bini, i du la me kpála bini nde amene siti 'ngú-o, a ka ní ne kpála inde ngakpokpo 'ngú gba ní-e pí 'Dyi ní. A ko Yesu Kilisito, kpála na ngbingbili-o. <sup>2</sup> Ngaani makpe-e, aní aha nani mukobho gba e ngubula me Ebhe 'e osisiti 'ngú gba ní ko. La-a, a ko bha bini ngubula osisiti 'ngú bhe gba ní-e de. Engú bini, a ko di ngubula osisiti 'ngú gba okpála na pála doto libhomu.

### *Yi lila olíli gba Ebhe-e malila*

<sup>3</sup> I du la me ní nde ngalila olíli gba Ebhe-e, ní tsia mbíla me ní mbíla Ebhe hana. <sup>4</sup> Lí kpála pa me ní mbíla Ebhe hana, engú bini, i du la

me kpála ang-o nde lila olíli gba ani-e de-e, amba a ko kpála na eu, kùkùlù 'ngú la di bhú ani ade. <sup>5</sup> Engú bini, kpála bhende ngalila 'li Ebhe ndjindji-e, a ko kpála bhende akúnda Ebhe kùkùlù. A bhomu-o engú inde ní ambíla ka e me ní akpòtse líní bhú dabilí bini ne Ebhe-o. <sup>6</sup> Kpála bhende ngapa me ní akpòtse líní bhú dabilí bini ne Ebhe-e, a ayo me mukobho gba kpála ang-o du di maka bhende gba Yesu adu nani lie ko.

<sup>7</sup> Ondaise ma na mukúnda, líli inde ma ngaye e pí yi inde-e, a ko líli na mbia de. Engú bini, a ko líli na didili. Yi asia nani líli ang-o nayie lí lilita.\* Líli na didili ang-o, a ko eli inde yi adje e-o. <sup>8</sup> La-a, ma ngaye pí yi inde-e líli na mbia. Kùkùlù 'ngú na líli ang-o ngau lie bhú Yesu, la di ne bhú yi. Padhá de, anga bití aholo nandjia aholo, zì 'kpí na kùkùlù-o aholo la di nasu aholo.

<sup>9</sup> Kpála bhende ngapa me ní bha ndju lí zì 'kpí me ani nde ngayala ndai e-e, kpála ang-o nga bha ngadu bhú bití. <sup>10</sup> Kpála bhende ngakúnda ndai e-e, kpála ang-o ngadu lí zì 'kpí. Kaka-a, engú inde í tí da nato kpála koko bhú siti 'ngú-o bhú ani belegu ade bini. <sup>11</sup> Engú bini, kpála bhende ngayala ndai e-e, kpála ang-o ngadu bhú bití. Aní ngadholo bhú bití, aní mbíla la di de me ní adji ne su-oie de, anga bití anini djila aní manini.

*Yi lila liyi ka ongú na doto malila*

<sup>12</sup> Odi ma, ma ngaye engú inde-e pí yi,

---

\* **2:7** 2:7 Nayie lí lilita: A ko nayie lí nedhinga inde u adje nani 'li Ebhe lie ko. Tsia bhú 1 Dja. 2:24, 3:11, di ne bhú 2 Dja. 1:5.

anga ka 'li Kilisito-o, Ebhe a'e siti 'ngú gba yi-e a'e.

<sup>13</sup> Odyi ma, ma ngaye engú inde-e pi yi,  
 anga kpála inde adu nani kala ndu 'ngú hana  
 nayie li lilita-a, yi mbila ani hana.

Omakombise, ma ngaye engú inde-e pi yi,  
 anga yi aha angu Siti aha.

<sup>14</sup> Odi ma, ma aye engú inde-e pi yi.  
 Padhá de, anga yi mbila 'Dyi ní hana.

Odyi ma, ma aye engú inde-e pi yi,  
 anga kpála inde adu nani kala ndu 'ngú hana  
 nayie li lilita-a, yi mbila ani hana.

Omakombise, ma aye engú inde-e pi yi, anga yi  
 ne angu bhú nabhuka .

La di-e, 'li Ebhe ngadu bhú yi, yi atsia aha la  
 di angu Siti.

<sup>15</sup> Kaka-a, yi akúnda doto inde-e de. Yi akúnda  
 di oehe inde bhúbhú-o belegu de bini. Li kpála  
 kúnda doto-o, amba ani kúnda 'Dyi ní Ebhe de.

<sup>16</sup> Padhá de, anga ndu oehe na doto-o hana maka:  
 gumu na sisiti inde bhú kpála, gumu nasia ndu  
 'he hana inde li djila ngau e, a la di-e, nadu ne  
 'ngbé 'ndji ka otia na doto, ndu 'he bhomu-o  
 hana ngayie ka 'Dyi ní Ebhe ade. Engú bini, a  
 ko ndu 'he na doto. <sup>17</sup> La-a, doto ngakodho 'kpí,  
 di ne ndu 'he inde bhúbhú-o hana. Engú la bini,  
 kpála bhende ngamene engú li Ebhe akúnda e,  
 ani ngadu bhú mukobho duduama ne duduama.

*Yi lila liyi ka obhulu yala gba Kilisito malila*

<sup>18</sup> Odi ma, sokpí-e akolo masikpe! Yi adje nani  
 engú inde u apa e adje. U apa nani me: «A ayo

me bhulú yala gba Kilisito-o go.» Mbia inde-e, obhulú yala gba Kilisito aze bhibhiti. Kaka-a, ní ngambila me sokpí-e akolo masakpe. <sup>19</sup> Okpála ang-o ayie bhú ká ní. Padhá de, anga a ko nani okpála ka ní de. I dú me u dú nani ne okpála ka ní-e, u de adu ne ní bhú dabili bini. Engú bini, u ayie bhú ká ní, mbia inde-e, a au lie mbámábá me ndu okpála bhomu-o hana, a ko nani naao okpála ka ní de.

<sup>20</sup> La pi yi-e, yi asia nani naayi Bua gba Ebhe. A atuko Bua ang-o pí yi ne Kpála na bubu. Kaka-a, yi ambila engú na kukulu-o ndu yi hana. <sup>21</sup> Engú inde ma aye e pi yi-e, a ko de ka me yi mbila engú na kukulu de-e de. Engú bini, ma aye pi yi anga yi mbila engú na kukulu-o hana. La di-e, eu ti da nakoto bhú engú inde kukulu-o belegu de bini.

<sup>22</sup> Kpála na eu-o, a ko da? A ko kpála bhende ngapa me Yesu ne Kilisito ade ko. Kpála ang-o, a ko bhulú yala gba Kilisito. Aní ayala Ebhe, aní atsia ayala di Ndili gba aní-o. <sup>23</sup> Padhá de, anga kpála bhende ayala Ndili-e, aní ayala di bhomu-o 'Dyi aní. Kpála bhende ngapa 'ngú gba Ndili-e mbámábá-a, aní ngapa di bhomu-o engú gba 'Dyi aní.

<sup>24</sup> Kaka-a, eli inde yi adje nani e nayie li lilita-a, a ayo me asi kuti e li bua yi. Padhá de, anga i dú me eli inde yi adje nani e nayie li lilita-a nde asi kuti e li bua yi-e, ngayi di-e, yi dú ne Ndili-e kpála bini, yi tsia dú la di ne 'Dyi aní kpála bini. <sup>25</sup> A bhomu-o ehe inde li Kilisito apa nani me ni ahá e pi ní-e, a ko mukobho na dudu ma.

<sup>26</sup> Ma aye engú inde-e pi yi pindji obhende ngagili napite yi ko. <sup>27</sup> Engú bini ngayi-e, Kilisito atuko Bua gba e pí yi. Bua ango-o ngadu bhú yi. Kaka-a, yi matá ne gumu musuno koko ade. Padhá de, anga Bu Bhobua ngasuno ndu 'ngú pi yi hana. La di-e, engú inde ani ngasuno e, a ko kukulu 'ngú, a ko eu de. Kaka-a, yi du bhú Kilisito maka li Bu Bhobua asuno lie pi yi ko.

<sup>28</sup> A moko odi ma, yi du bhú Kilisito, amba nedhinga inde ani akóto lie, ní adú ne tsulu de, ní adú kala ani ne numu de. <sup>29</sup> Yi mbila ndjindji me Kilisito ngbingbili. Kaka-a, ayo me yi mbila la di me ndu kpála hana inde ngamene engú na ngbingbili-e, kpála ango-o, Ebhe azu ani ngae.

### 3

*Engú inde asuno me ongisi gba Ebhe-e kpi ne obhende gba Djabulu-o*

<sup>1</sup> Yi tsia nga maka li 'Dyi ní asuno mukunda gba e pi ní lie-o. Mukunda ango-o, a ko me ní asia 'ili me ní ne ongisi gba Ebhe. Ní la bhadi mo-o na paká! Kaka-a, okpála na doto mbila ní de, anga u mbila di nani Ebhe de. <sup>2</sup> Ondaise ma na mukunda, mbia inde-e, ní ne ongisi gba Ebhe. Engú la bini, lele maka ní adú lie, asuno nga lie mbámhá de. La-a, ní ngambila me, nedhinga inde li Kilisito akólo lie, ní adú maka ani. Padhá de, anga ní aú ani maka ani nde lie-o. <sup>3</sup> Kaka-a, kpála ne kpála inde nga'o 'to e 'to ani-e, nga'o lie bubu maka ani nde lie bubu ko.

<sup>4</sup> Ndu okpála hana inde ngamene siti 'ngú-o, ngagumu líli gba Ebhe. Padhá de, anga siti 'ngú,

a ko nagumu líli. <sup>5</sup> Engú bini, yi mbila hana me Yesu Kilisito ago ngubula na'e ongú na sisiti. La di-e, siti 'ngú bhú ani belegu ade bini. <sup>6</sup> A moko, kpála inde ngadu me ani nde bhú Yesu-o, ani memene siti 'ngú de. La-a, kpála inde amemene siti 'ngú-o, kpála ango-o u nga ani de. Ani mbila la di ani de.

<sup>7</sup> Odi ma, a ayo de me kpála bini pite yi-e de! Kpála inde ngamene ngbili 'ngú , ngaani makpe-e, ani ngbingbili maka li Yesu Kilisito nde lie ngbingbili ko. <sup>8</sup> Kpála bhende adhedhe li namene siti 'ngú-o, a ko kpála ka Djabulu. Padhá de, anga nayie bha bini ali lilita-a, Djabulu bha naae ne kpála na siti 'ngú. Ta nago ka Ndili gba Ebhe-e ngae inde: ani ago ngubula nabhelo okulu gba Djabulu-o.

<sup>9</sup> Kpála bhende li Ebhe azu e ngae, ani dhédhe matá li siti 'ngú belegu de bini. Padhá de, anga nguwa\* inde ngayie ka Ebhe-e, ngadu bhú kpála ango-o ko. Ani ti da nadhedhe matá li siti 'ngú belegu de bini, anga Ebhe azu ani ngae. <sup>10</sup> Engú inde-e ngagbogbo bhusu ongisi gba Ebhe ne obhende gba Djabulu-o ngae inde: ndu kpála hana inde i mene 'ngú na ngbingbili de-e, inde i kunda la di ndai e de-e, a ko ndili ka Ebhe de.

*Ní du ne mukunda sunda ní*

<sup>11</sup> Engú inde yi adje nani e nayie li lilita-a, ngae inde: a ayo me ní du ne mukunda sunda ní. <sup>12</sup> Ní adú maka Kaina de, inde adu nani kpála gba Siti-o. La di-e, ani abhelo ndai e. Ani abhelo la

---

\* **3:9** 3:9 Nguwa: Nguwa gba Ebhe-e, a ko Bu Bhobua.



nani ani ngubula ni? Aní abhèlè ani anga okulu bhende gba ani-e adu nani sisiti. Engú bini, obhende gba ndai ani atsia adu nani ngbingbili. <sup>13</sup> Ondaise ma, i du me okpála na doto inde-e nde ngayala yi-e, yi angamba de. <sup>14</sup> Engú bini nganí-e, ní ambíla me ní ayie bhú kuo, ngú nali bhú mukobho, anga ní ngakunda ondaise ní. Kpála bhende li mukunda nde bhú e ade-e, ani ngadu nga bha bhú kuo.

<sup>15</sup> Ndu kpála hana inde ngayala ndai e-e, a ko bhulu nabhèlè kpála. Yi mbíla la di ndjindji me bhulu nabhèlè kpála bini ade inde ne mukobho na duduma bhú e. <sup>16</sup> Mukunda-a, a ko ni? Ní ngambíla mukunda li ehe inde: Yesu Kilisito aha nani mukobho gba e pi ní. Kaka-a, nganí di-e, a ayo me ní ha mukobho gba ní-e pi ondaise ní. <sup>17</sup> Ní pa nga me, kpála bini inde ka e ne oehe, ani au ndai e inde li ehe nde ka e ade, la-a, ani dje ndjinga ani de. Lele pi u ti da napa lie me kpála ango-o akunda Ebhe-e? <sup>18</sup> Odi ma, a ayo de me ní du bha napa 'ngú na mukunda ne babadha eli-e de. Engú bini, a ayo me ni suno bhú kulu, di ne bhú engú na kuku.

*Ní adú kala Ebhe ne tsulu de*

<sup>19</sup> A bhomu-o engú inde ní ambíla ka e me ní bhú kuku 'ngú ko. La di-e, li bua ní tsia dú guguo kala Ebhe. <sup>20</sup> Padhá de, anga i du me bua ní nde ngapa pi ní me ní ne engú-o, ní ngambíla ndjindji me Ebhe-e, ani ngbéngbé ane bua ní mane. La di-e, ani ambíla ndu 'ngú hana má kpəkèbhè! <sup>21</sup> Ondaise ma na mukunda, i du me bua ní nde apa me ní ne engú ade-e, ní dú

kala Ebhe ne tsulú de. <sup>22</sup> Ní ngasia 'he inde ní ngayo e ka ani-e, anga ní ngalila olíli gba ani, ní la di ngamene engú inde ani akúnda e-o. <sup>23</sup> Líli gba ani inde ani aha e pí ní-e ngae inde: a ayo me ní bhuka 'li Ndili gba ani Yesu Kilisito. A ayo la di me ní dú ne mukúnda sùnda ní maka lí Kilisito aha líli lie pí ní ko. <sup>24</sup> Kpála bhende ngalila olíli gba Ebhe-e, kpála ango-o ngadú bhú Ebhe, Ebhe ngadú la di bhú ani. A inde-e engú inde ní ngambila ka e me Ebhe ngadú bhú ní-o: ní ngambimbila lí Bu Bhobua inde lí Ebhe aha e pí ní-o.

## 4

### *Yi gbo bhúsu Bua na kúkúlu 'ngú ne bua na eu*

<sup>1</sup> Ondaise ma na mukúnda, yi abhúka ndú okpála hana bhende ngapa me a bhú o ne Bua gba Ebhe-e de. Engú bini, yi le ngaiza uo kalanú-o male, amba yi mbila ne me bua inde bhú uo-o, ayie ka Ebhe na paká. Padhá de, anga opolofeta na eu, aya naali píla doto. <sup>2</sup> Ehe inde yi ambíla Bua gba Ebhe-e ka e, a ngae inde: kpála ne kpála bhende ngapa me Yesu Kilisito ago nani bhú kúte na kpála-kúti na paká-a, kpála ango-o, a bhú ani ne Bua bhende ayie ka Ebhe. <sup>3</sup> La-a, kpála bhende ngapa me Yesu Kilisito go bhú kúte na kpála-kúti de-e, kpála ango-o, bua bhende bhú ani-e, ayie ka Ebhe de. Engú bini, bua bhende bhú kpála ango-o, a ko mangbo bhende gba bhulú yala gba Kilisito ko. Yi adje nani adje

me, a ayo me bħulũ yala gba Kilisito go. Mbia inde-e, ani pĩla doto.

<sup>4</sup> Engũ bini, odi ma, ngayi-e, yi naayi ne okpála gba Ebhe. Yi aha angu opolofeta na eu-o aha. Padhá de, anga Bua bhende bhú yi-e ne angu naali ane bua bhende bhú okpála na doto-o mane. <sup>5</sup> Opolofeta ango-o, a ko okpála na doto. U ngakpo la bhadi engũ na doto. Kaka-a, okpála na doto ngadje uo ndjindji. <sup>6</sup> Engũ bini, nganí-e, ní ne okpála gba Ebhe. Kpála bhende ambila Ebhe-e ngadje ní ndjindji. Kpála bhende naae ne kpála gba Ebhe ade-e, ani djé ní de. A bhomu-o engũ inde ní ngambila Bua na kũkũlũ 'ngũ di ne bua na eu-o ka e ko.

### *Ebhe-e, a ko mukunda*

<sup>7</sup> Ondaise ma na mukunda, ní dũ ne mukunda sũnda ní, anga mukunda ayie ka Ebhe. Kpála bhende ne mukunda bhú e-e, Ebhe azu ani ngae, ani mbila la di Ebhe hana. <sup>8</sup> Kpála bhende li mukunda nde bhú e ade-e, ani mbila Ebhe de, anga Ebhe-e, a ko mukunda. <sup>9</sup> Lele maka li Ebhe asuno mukunda gba e lie pi ní-e ngae inde: ani atima koli Ndili gba e bini pĩla doto, ngũbula me ní dũ bhú mukobho ka ani. <sup>10</sup> Lele maka li mukunda nde lie ngae inde: ní kũnda nani Ebhe nganí de, engũ bini, ani akũnda mangbo nani ní ngae, ani atsia atima Ndili gba e pi ní maka tia mangimbo, ngũbula na'e osisiti 'ngũ gba ní ko.

<sup>11</sup> Ondaise ma na mukunda, i dũ me Ebhe nde akũnda ní naali mo-o, nganí di-e, a ayo me ní dũ ne mukunda sũnda ní. <sup>12</sup> Kpála u nga Ebhe belegũ de bini. I dũ me ní nde ne mukunda

sunda ní-e, amba Ebhe ngadu bhú ní. La di-e, mukunda gba ani inde bhú ní-e bedhe má kpambi!

<sup>13</sup> Ehe inde ní ngambila ka e me ní ngadu bhú Ebhe, Ebhe la di ngadu bhú ní-e, a ngae inde: Ebhe aha Bua gba e pi ní. <sup>14</sup> 'Dyi ní atima Ndili gba e ngubula nadu Mukobho gba okpála. Ní au, ní la di ngakpokpo 'ngú tété. <sup>15</sup> Kpála ne kpála inde apa mbámbá me Yesu ne Ndili gba Ebhe-e, Ebhe ngadu bhú kpála ango-o. Kpála ango-o la di ngadu bhú Ebhe. <sup>16</sup> La di nganí-e, ní ngambila mukunda inde li Ebhe nde ne e pi ní-o. Ní atsia abhuka la di mukunda ango-o ko. Ebhe-e, a ko mukunda. Kpála bhende ngadu bhú mukunda-a, ngadu bhú Ebhe, Ebhe la di ngadu bhú ani.

<sup>17</sup> I du me mukunda inde bhú ní-e nde bedhe-e, ní du ne tsulu li ekpi inde li Ebhe akódho 'ngú gba okpála lie de. Padhá de, anga píla doto inde-e, mukobho gba ní-e mana lie ne bhende gba Ebhe ko. <sup>18</sup> Tsulu bhú mukunda ade, anga li mukunda du bedhe-e, a nga'e tsulu hana. A moko, kpála bhende ngadje tsulu-o, a pa me mukunda gba ani-e kolo nga bedhe de. Padhá de, anga kpála bhende ngadje tsulu-o, abhú ani ne mabhundja me u améne ni sisiti.

<sup>19</sup> Engú bini, nganí-e, ní sunda ní ne mukunda, anga Ebhe akunda ngaiza ní kalanu ngae. <sup>20</sup> I du me kpála bini nde apa me: «Ma akunda Ebhe», ani nde la ngayala ndai e-e, amba kpála ango-o ne bhulu eu. Padhá de, anga ani ti da nakunda Ebhe inde ani u e de-e de, i du me ani nde kunda ngaiza ndai e inde ani nde ngau e mau-o de ko.

21 Lili inde li Kilisito aha e pi ní-e ngae inde: kpála inde akunda Ebhe-e, a ayo me ani kunda di ndai e.

## 5

### *A ti da naha angu engú na doto da?*

<sup>1</sup> Ndu kpála hana inde ngabhuka me Yesu ne Kilisito-o , Ebhe azu kpála ango-o ngae. La di-e, kpála inde ngakunda Ebhe inde azu kpála bhomu-o, ani ngakunda bhadi ongisi inde li Ebhe azu o moko. <sup>2</sup> Ehe inde ní ambila ka e me ní ngakunda ongisi gba Ebhe-e ngae inde: a ko nakunda Ebhe, di ne namene olili gba ani ko. <sup>3</sup> A moko, lele nakunda Ebhe-e ngae inde: a ko namene olili gba ani-o. La di-e, olili gba ani-e pi ní kpekpeke ade. <sup>4</sup> Padhá de, anga ndu kpála hana inde li Ebhe azu e, ani aha angu engú na doto aha. Nabhuka gba ní-e ngaha angu pi ní ngú naha angu engú na doto ngae. <sup>5</sup> A ti da naha angu engú na doto da? A ko bha bini kpála bhende abhuka me Yesu ne Ndili gba Ebhe.

### *Nakpokpo 'ngú pindji Yesu Kilisito*

<sup>6</sup> Yesu Kilisito, a ko kpála inde nani ago-o. Ani ago nani ne engu di ne ngute\* Ani go bha bini ne engu de, engú bini, ani ago ne engu di ne ngute. La di-e, Bua gba Ebhe-e ngakpokpo 'ngú gba ani-e ngae, anga Bua gba Ebhe-e, a ko kukulu 'ngú. <sup>7</sup> A ngakpokpo 'ngú tété ne oehe bata: <sup>8</sup> a ko Bu

---

\* **5:6** 5:6 Engu di ne ngute: Bhelé na okpála ngabhundja me engu-o, a ko batisimo gba Yesu-o, ngute-e, a ko nakpi gba ani-o.

Bhobua , a ko engu, a la di-e ngute. Ndundu bata hana aziba ne bua bini.

<sup>9</sup> Ní ziziba engú inde li okpála ngakpokpo e ndjindji. La-a, engú bhende li Ebhe akpokpo e ngae-e, ane bhende gba okpála-a mane. A bhomu-o engú bhende li Ebhe akpokpo e pindji Ndili gba e-o. <sup>10</sup> A na paká me kpála bhende abhuka Ndili gba Ebhe-e, kpála ango-o asia engú inde akpokpo lie bhomu-o li bua e makpe asia. Engú bini, kpála bhende i bhuka Ebhe de-e, kpála ango-o nga'o Ebhe bhulu eu. Padhá de, anga engú inde li Ebhe akpo e pindji Ndili gba e, kpála ango-o bhuka naae de. <sup>11</sup> Engú ango-o ngae inde: Ebhe aha nani mukobho na duduma pi ní, mukobho ango-o la bhú Ndili gba ani ko. <sup>12</sup> Kpála bhende li Ndili-e nde bhú e, abhú kpála ango-o ne mukobho. Engú bini, kpála bhende li Ndili gba Ebhe-e nde bhú e ade-e, mukobho bhú kpála ango-o ade.

### *Engú pindji mukobho na duduma*

<sup>13</sup> Ma aye balua inde-e pi yi, ngayi okpála bhende abhuka 'li Ndili gba Ebhe-o. Ma aye pi yi, amba yi mbila me yi asia mukobho na duduma asia. <sup>14</sup> Engú ní nde lie ne tsulu kala Ebhe belegu ade bini-e ngae inde: ní ngambila ndjindji me, i du me ní nde ayo 'he ka ani maka ani ngakukunda lie, ani djé ní. <sup>15</sup> I du la me ní nde ambila me ani ngadje ní bhú ndu mayo gba ní-e hana-a, ní ambila dí ndjindji me ní asia 'he inde ní ayo e ka ani-e asia.

<sup>16</sup> I du me kpála bini nde au ndai e ngamene siti 'ngú-o, li siti 'ngú ango-o du bhende i tó ani

bhú kuo de-e, a ayo me ani yo Ebhe ngú ani, amba kpála na siti 'ngú ango-o sia mukobho. Bhoḃhomu ndjindji pi kpála bhende ngamene siti 'ngú inde i tó ani bhú kuo de ko. Engú bini, a ne siti 'ngú inde ató kpála bhú kuo, ma pa de me u yo Ebhe ngú bhende bhomu-o de. <sup>17</sup> Ndu 'ngú hana inde ngbingbili bhú djila Ebhe ade-e, a ko siti 'ngú. La-a, ndu 'ngú hana toto kpála bhú kuo de.

<sup>18</sup> Ní ngambila ndjindji me kpála inde li Ebhe azu e ngae dhedhedhe li namene siti 'ngú belegu de bini. Padhá de, anga Yesu Ndili gba Ebhe-e ngalila ani ngae, la di-e, Siti ti da namene 'he ngú ani belegu de bini.

<sup>19</sup> Ní ambila me ní naaní ne okpála gba Ebhe, engú la bini, doto libhomu sa 'kpa Siti.

<sup>20</sup> Ní ambila me Ndili gba Ebhe-e ago, ani atsia aha imbilangu pi ní, amba ní mbila Ebhe na kukulu-o. Ní akpetse liní ne Ebhe na kukulu-o, li pápá gba Ndili gba ani Yesu Kilisito. Ngaani-e, a ko Ebhe na kukulu, a ko la di mukobho na duduma.

<sup>21</sup> Odi ma, yi lila liyi ka oebhe na eu-o ndjindji.

**Gandja na Mbia**  
**Mayogo: Gandja na Mbia (New Testament)**

copyright © 2020 Wycliffe Bible Translators, Inc.

Language: (Mayogo)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 3 Mar 2023 from source files  
dated 29 Jan 2022

6b4904fb-f8ce-5931-8218-7cee8914232c